

張文襄公駢文

張文襄公全集

駢文目錄

起卷一百一十二訖卷一百二十三

駢文目錄一

恭撰諭祭刑部左侍郎袁保恆文

恭撰諭賜刑部左侍郎袁保恆碑文

恭撰諭賜署烏魯木齊都統哈密辦事大臣保恆

碑文

恭進勦平粵匪方畧表

代

恭進勦平捻匪方畧表

代

駢文目錄二

爲同年劉榕樓太史畫乞假歸娶圖徵詩啟

馮萃亭宮保七十壽序

陳子良封公六十壽序

子青中堂五兄八十壽序

李少荃傅相七十壽序

鐵如意頌

故定州直隸州知州馬佳君祠碑

祭伏羲文王周公孔子祈雨文

祭伏羲文王周公孔子謝雨文

祭關忠節公

天培

張忠武公

國樑

文

祭漢虞仲翔唐韓文公宋蘇文忠公文

祭晉陶桓公唐宋文貞公明韓襄毅公王文成公

國朝阮文達公林文忠公文

祭岳忠武王文

祭吳文節公文

祭羅忠節公文

祭畿輔先哲文

武昌題襟集序

闕

送奎樂山之官察哈爾都統序

闕

孝貞顯皇后諫

闕

祭劉忠誠公文

闕

駢體文目錄終

張文襄公全集卷卷二百二十一

駢體文一

恭撰諭祭刑部左侍郎袁保恆文

朕惟周禮重行人之選，賙彼凶荒，雅詩稱從事之賢，傷其盡瘁。況際此需材之會，忽奪茲任事之臣。爾原任刑部左侍郎袁保恆，瞻智肫仁，瓌材閎器，羽儀華國，綺齡登瀛海之班，弓冶承家，雅志殄淮濱之醜。惟有文必有武，何敵不摧。資事父以事君，有功不伐。錫霸都之勇爵，超坊局之華資。一持分校之衡，屢負從軍之羽。調和諸將，掃河朔之風塵。饋饗三秦，龜西陲之組練。度支入佐

明倫彙編 家範典 卷一百一十一  
薄算緡言利之爲刑憲分司無鉗網深文之習比以中  
原告褫宮寢殷憂持武康之節而還鄉發洛口之倉以  
安眾肩勞不避府怨不辭北斗南箕久告軸空之病庚  
糧癸水幾窮佩藥之呼王尊沉馬以誓神願將身代蘇  
軾起龍而致雨卒與天通幸哉兩河之更生已矣九京  
之不作以爾官亞九列而立朝未滿五年以爾氣雄萬  
夫而賦命不登中壽未殫厥用深惻於懷於戲馨方社  
之犧牲竟丁耗斲聽澤中之鴻雁永念劬勞茂此飾終  
庶歆昭奠

恭撰諭賜刑部左侍郎袁保恆碑文

朕惟馳驅奔走盡臣表許國之心壹惠尊名惇史垂旌  
賢之典哀榮允備芳烈難渝爾原任刑部左侍郎袁保  
恆世薦忠貞兼資文武自起家於詞翰早抗志於澄清  
吳澄不習駢文恥爲俗學曹瑋深明將略綽有門風凡  
承歡子舍之年皆戮力戎旃之日迴翔芸館洊貳棘卿  
三參軍謀兩筦綱運戰河南戰河北盡消萑寇之狂波  
自陝東自陝西廣闊蕭侯之甬道元和簿上贊儉德而  
圖豐城且書中輔祥刑以弼教職方曹局而有通籌國  
計之心身處朝廊而有經略四方之志會鄭圖之上奏  
命汲節以巡行艱難告辰糴之哀慷慨作酉漿之乞行



糜哺粥信既竭於心思索鬼責神甘自捐其頂踵乃三  
農慰望靈雨方零而六沴爲災使星遽隕綜計一生征  
役功名多在於兵閒洵乎晚節勤勞老死不終於牖下  
儒臣罕覩士庶盡傷惟文者足以經時惟誠者勇於報  
國錫茲美諡數本朝止有三人溯彼舊勲俾兩世同光  
列傳於戲風淒大樹留江淮草木之威名月照豐碑還  
河嶽英靈之閒氣誕敷成績永揭鴻辭

恭撰論賜署烏魯木齊都統哈密辦事大臣保恆  
碑文

朕惟定遠耀兵於絕域威行三十六居國之間盡頭盡

瘁於暮年名在二十八功臣之右重以一門之就義可  
無重巽以旌忠爾前署烏魯木齊都統哈密辦事大臣  
保恆簪褭勳門珠鈴將種衍四衛拉特之貴族氣奮風  
雲讀七大黃冊之祕書胸羅象緯出爲牙將領銀槍效  
節之都繼帥偏師居黃河遠上之地屬重臣經營西事  
爲國家薦舉邊才一歲超遷三邊提控甘泉烽火惟資  
當道之王隄濬水堅冰不渡臨流之銅馬刀筆偶嬰乎  
吏議鼓輦旋動於宸思揚旂結骨之窮邊杖節尉頭之  
蕃部酒泉天遠方謝病以還鄉橫海軍多頓奮髯而投  
袂時則黑白大食瘡毒秦關前後車師要遮漢使以伊

吾盧爲西陲近塞用作保障之臣以郁立師爲北道兵  
衝使處搯吭之地河魁神將僅存戊己之屯兵派罕妖  
氛遂傳庚辰之郊壘半冰已盡嚙革餐筋三版將頽嚼  
齧裂眚忘良夫之跛每捫足以勞軍聞宗澤之呼已伏  
張而飲血勦撞炬擲臺城之守將先亡刀缺泉枯疏勒  
之外援不至黑雲壞壓梯衝競舞於易京赤燄怒生巾  
櫛逢災於亳社並不爲保妻子之計曾何異死封疆之  
臣戰狀上聞卹章備舉今者龍堆饒唱柳谷烽銷閔茲  
九攻九拒之孤臣不見三絕三通之盛事犂山已剪思  
睢陽遮遏之功軍就伏誅訪長史捐軀之地幸趙評之

有子求骨迎喪哀卞壺之闔門招魂併命贈之魏秩饗  
以明禋嘉其有服遠之威以殘卒破摧羣醜謂其有安  
眾之略以彈丸維繫邊庭考行易名曰桓與靖金風鐵  
雨英靈永作長城蕙燼蘭銷馨烈發諸劫火於戲兼張  
車騎龐中郎之美謚汗簡有光配姜行本裴行儉之穹  
碑沙場生色載鋪偉節峻此恩章

恭進剿平粵匪方略表

代

臣奕訢等誠歡誠忭稽首頓首上言欽惟我 皇上虹  
壁當陽龍圖啟運靈臺測景值漢日之再中柳谷占星  
識堯天之無外 兩宮垂訓孝治洽而鈞鈐明六幕同  
文威裊張而玉衡正以聖繼聖秉大武於三曾鞠

人謀人揚天聲於七德商威有截軫馳桂海之文姬錄  
無疆策探岱宗之字善繼觀成之志有此武功實惟懿  
德之光受茲介福覩瑤光七宿爲河海清宴之休徵考  
金版六韜見旋轉乾坤之經緯國家宗基磐固疆索孟  
安六七作配上帝之郊禋三萬里入司空之版籍慶霄  
輝宙瑞露膏年間有扞網之愚不煩折箠而定蜎蠖翔  
泳涵亭育之慈象寄譯鞬化陸梁之氣屬以神州康阜  
潛伏蘖芽邊吏恬嬉偶寬銜轡乃有粵匪洪秀全者天  
資凶譎左道俯張恃嶺嶠之阻深謂潢池之可試焚香  
絳帕入祆社而稱靈義米朱符託神叢而號衆乘火早

木饑之厄五龍講經聚跳刀走戟之徒斗米作賊裾緣  
采綫始過市而無譏囊探赤丸遂犯門而罔忌紅巾六  
等白梃千羣自知僂民甘效奴賊獬咋人而漸大螳拒  
轍而能驕智高有邕廣自王之心王則造彌勒持世之  
語妖星害氣宵躔藤峽之山虺毒豺牙晝飲桂林之水  
牙璋初發鐵額方張蟲沙之剜化已多蟲螭之撲搔難  
盡四面招討圍鎮無功諸道行營扼巢不效奔兕開樊  
於百粵駭鱗觸網於三湘盧循下桑落之洲楊太奪洞  
庭之口雖嬰城搏戰不少九攻九拒之方而散地投戈  
難用四正四奇之陣名城大郡唳鶴驚風長江洪湖飛

鯨跋浪梁山橫鎖難爲扼截之謀采石量繩坐失喉衿  
之險穿刀容足衝朱雀之大航鳴鼓吹脣躍青絲之白  
馬奪艤艫而載火伏艣艫以藏兵盜鍾山龍虎之都爲  
朱圉懿餘之穴蝟繁鋒厲傳烽達於淮壖兔狡窟多蘊  
毒延乎江表方且扇其蠅醜綴我貔軍吳淞旣困於攻  
梁晏鰲復創於襲晉眩迷歸路鋌走郊畿橫行者宋江  
三十六人城守者河北二十四郡狼星睽睨敢向威弧  
鼇足撼搖自投天網 文宗顯皇帝拯萬方之厄申九  
伐之經歐刀行失律之誅齋斧選折衝之將懿親藩衛  
河閒孝恭之賢異姓名王沙陀赤心之勇廉頗季牧出

自禁中閱天泰顛拔於材武得狄青於西班牙而任以專  
閫收徐勣於歸義而用作干城虞允文起自書生岳家  
軍出於義勇知之而善任用之而不疑乃韓璇機閫金  
葵以爲欲傾孽窟先據上游欲折兇鋒先清三輔河魁  
應將井鉞森芒太乙陳軍雷礮鬱怒羊頭鶴膝尙方蘭  
綺之兵朔鉞燕弧六郡良家之子鼓洪爐而爍毳氈濛  
汜以澆瑩欄鼓殷天鏐旗捲霧老羆當道先扼勝於天  
津狂象走林遂合圍於連鎮赤龍吐電挾礮石以飛鳴  
鐵騎凌霜踏河冰而平渡中黃士勁箐矢三鏹太白旗  
高衝輞百丈長纓繫賊吉林詐馬之健兒飛火注槍蒙



古打生之蕃部布周陟而剗地暈月成規拔渠答而踰  
濠陣雲如墨剖巢入穴桎貳負以歸朝飲刃伏樵血溫  
禺而釁社高唐州一鼓而下梟鳴牙中馮官屯三版難  
支鼃沈竈底臨戎鼓蓋人識高敖曹之容破陣筋饒軍  
奏蘭陵王之曲投弓窮羿果知射日之難被髮狂夫始  
悔渡河之誤然而北風雖勁南紀未康方棄螯之將窮  
適前禽之不戒相州師潰蜀郡彭亡致財賦之大藩成  
荆榛之戰地神謀早定天策無遺用陶侃鎮武昌之西  
門使諸葛督長沙之軍賦長沙完而糧通甬道武昌奠  
而水建高瓠築塢守濡須之城輕兵塞淮泗之口衣冠

慨范蠡立君子之營舩舫魏賊楊僕創樓船之號楚  
歌四面八千子弟之軍湘水九迴十萬水犀之弩三呼  
蒼兕黑稍公陷陣如飛十丈青龍黃頭郎習流而舞先  
清岳鄂則夏口燒船繼埽斬黃則九江歸漢揚旂於皖  
公山下而殺師之角先摧刷馬於彭郎湖中而攀鞬之  
臂已斷蔽江流柁頓成破竹之形曳地明光已有撥豷  
之勢當是時 文宗顯皇帝方以十科選士五聽求言  
周宣側身漢文拘憚神經金匱授自九天澄鑒銀華燭  
乎萬里發蹤導窾晨披白阜之圖晨食求衣夜聽赤囊  
之報輟裘敝賜千營銜挾續之溫畫箸伐謀諸將決埋

根之計爲民請命之語惻愴於丹綸舊從罔治之條諄  
詳於申命七旬弗格知頑惡之將殲百六已過卜貞元  
之必復覘燕巢於齊幕待藥母野之弓聞鶴語於堯年  
遽鑄荆湖之鼎應門顧命不忘未濟之艱難畢郢升祠  
卽兆大勳之底定 皇上上元膺運下武作求當秉璋  
奉瑄之辰有合璧聯珠之慶稟承聖善奉若詒謀凡問  
安視膳之年皆訪道陳謨之日山川聚米挈地絡於目  
中撻伐哀荆運乾符於掌上首清朝列爰整戎機知李  
靖有武略而兼文謀命曹彬以大將而爲使相趙陽閭  
馬皆先帝簡拔之遺彭濮微盧極公侯腹心之選時

1940-1941

五兵五當臨枝墜而技窮鳶綆沈而書絕於是將騎將  
步爲鶴爲鵝埽外援而足盡虵僵塞走路而河枯魚泣  
地中鼓角道古攻其東南樓上梯衝亞夫備其西北餘  
艘失水遁甲開山劉窟頭將掘地之兵甘興霸作升城  
之督指招搖之星怒雲旂飛揚候箕壁之風高火輜具  
舉星丸撒火地軸都搖素練騰風天梯直上雷公擊鼓  
應龍之翼齊張庭氏彎弓妖鳥之巢立覆防風已戮辨  
巨骨於專車侯景未寒藏漆頭於武庫滅塵鏃迹盪穢  
湔腥舉旛炳乎騶牙積甲高於熊耳洛陽父老重見漢  
官威儀常侍囊鞬來迎大將旗鼓思明旣殛朝義知窮

懸瓠旣夷洞曲自潰洪仁玕孽童旣殄遠行袁尙之顓  
李秀成副賊成禽生對樓蘭之簿西江餘氣嶺外殘魂  
或逋誅於黔蜀之交或遺種於雍秦之境靡不枯摧朽  
落冰泮燼灰高張露布之長緋競唱勤歸之雅樂甘泉  
飛報聞吉語於五日之中明堂大開舞文于於兩階之  
上鐘鳴長樂喜動慈顏弓挂橋陵慶邀靈貺昔苗今稷  
成文王丕冒之功後舞前歌誦太姒徽音之化惟天  
惟祖燔柴鏤璧之上儀視公視侯喬嶽翕河之茂典珠  
邱昭告三矢前驅璇極光輝壹戎大定瓚圭鬯卣釐召  
虎而剖符倬勒鑾旂寵尸臣而銘鼎綜稽功簿皆容資

轉三階永詔勲常不僅侯封萬戶拔都標號如銀槍效  
節之榮鵬尾影冠逾金璫附蟬之貴帷中閫外露湛雲  
需尺功寸長天施海潤蓋帷紆惠酌勒事之盡臣粟帛  
流恩慰國殤之猛士授羽林孤兒之職俾紹家聲廣博  
士弟子之員用旌敵愾農租蠲鉅商算裁緡猶復愼埴  
思艱涉淵知懼智周善後不忘懲毖之詩本務勸農特  
可懇屯之奏遣遊勇而脫巾不譟散鄉團而賣劍無虞  
火猛水寬舉循吏以安清剛吳輕楚剽設水師以控長  
江簫勺羣頑盧牟六寓鏑銷燧灌劍脫戈包在昔殷伐  
鬼方僅威夷落周平淮浦未滅徐戎唐中葉不能清河

朔戎馬之塵宋盛時不能取夏州彈丸之地然猶揆張  
鴻號鋪侈駿聲以準清時洵躋前古茲者肇修軍志臚  
紀宸謨揆諸經文則雅頌以告成功之義稽諸史例則  
通鑑紀事本末之編溯調牙徵發之初底偃伯武成之  
日蓋俶擾者十有六省披猖者十有五年其黠鷲則甚  
於赤眉青犢之徒其孽萌則夥於方臘曹成之眾跨州  
連郡儼羽翼之將成襟江帶湖幾牢膠而不拔嗚呼  
嘯已徧蹢通報德之維蟻國猴冠敢竊宇宙柱天之號  
此蓋仰賴天戈仗順廟算籌全張網羅賢不限以循資  
之格鑿門遣將不撓以中制之權不臨陣易將而奪符



不愆賞惜官而刊印南人使船北人使馬不違地以遷  
良徯地則合園地則謀不隨方而浪戰盜兵軫念不舉  
獻俘受馘之儀倒戟歸仁不用伍畀曹誅之法軍書略  
驛而春千秋籥不廢修文度支浩穰而丁算口錢不聞  
加賦前光垂憲繼序紹聞用能蒼粹孚精珠鈐制勝下  
湔塹黷上答光靈文母冠十亂之勲湯孫建四方之極  
鈞臺誓眾瞻禹迹之重光鄙邑升壇告炎符之上瑞北  
征六月南征采芑煥景命以重熙內治天保外治采薇  
播休聲爲大愷臣等依光丹地載筆蘭臺實均慶於普  
天敢竭誠於測海繫年繫月知整軍經武之有方丕顯

丕承著保大定功之有本守難於創繹魏徵敷對之言  
安不忘危鑒宣聖繫辭之訓訂長編四百廿卷寶笈常  
輝祝鴻祚億萬斯年金甌永鞏東南尉而西北候定皇  
輿一統之經天地闢而日月光上帝世六符之頌臣等  
無任瞻天仰聖踴躍歡忭之至謹拜表恭進以聞

恭進勦平捻匪方略表

代

臣奕訢等誠歡誠忭稽首頓首上言欽惟我 皇上抱  
表體天握機括地八紘瑞玉車書鍾明備之期七緯文  
鉤律度邃緝熙之學濬哲纂放勳之業窮奇偕禱机而  
誅紹庭率昭考之規郁里繼淮夷而靖受駿厖而九圍

式湯鉞除殘斷鼉足而四極安媯簣幹化崑崙薦版況  
中邦堂奧之區招矩收鋒還率土壤衢之樂昔平江左  
陋七策於隋書今定淮濱誦二篇之柳雅譬如錫圭導  
水而岷山積石有南條北條之殊迎筴占星而竹彗天  
猿有青方白方之異紫極明潤則禮氣循次而銷鋒黃  
輿父安則洪濤分趨而伏軌奠三靈而拯水火是曰寶  
慈光四海而通神明斯爲適孝衍乾坤之策擬周易之  
有下經颺神聖之功分虞書以爲二典原夫房心之分  
徐豫之交淮潁下游海岱西境南連南豫東走東蒙畫  
河山兩戒而適界中央歷南北六朝而常爲戰地山川

盤互風氣雄驚人習椎埋戶高搏擻矯虔亂紀往昔同  
符陽夏鳴狐彭城戲馬龐萌李憲偕銅馬以稱戈尹禮  
闕宣乘黃巾而樹幟唐憲圖治而淮西拒命者四十年  
廣明不綱而冤句弄兵者六十萬世爲巖邑俗等互鄉  
已久漸翔洽之皇風猶隱伏崖柴之故態越人揭篋借  
客彎弧突鬢縵纓危冠利劍故嘗授健吏以潛柔其爪  
距宿牙兵以默寓其維婁自瓠子決流宣房未塞尉佗  
崛強魑結稱兵際元二之災年階萑苻之厲梗察眉雖  
識傳桴鼓而先逃望面成禽響帶鈴而奪去數百人爲  
一捻捻各有旗數千家爲一圩圩各有寨旗雜糅而如

蝸蟻之沸塞錯峙而如蠡蟻之屯淪牡者號將軍摸金  
者呼校尉九千徒眾分領莫邪之都十五健兒便作難  
當之賊毛面絳頭之狀浮雲白雀之名來則呼嘯沸天  
去則燔焦赤地豺頭當道燕餒巢林據渦口爲安窩視  
梁郊爲熟路向平原而馳驟空設蘭防介四省之邊陲  
幾同甌脫釋兵執耒伏戎則李密騎牛蹈疊擊虛出穴  
則王良策馬雖復羊分九牧士募三科稍鍛羽毛未探  
要領 文宗顯皇帝憤其數虐閔此此離琅鐸專征荆  
幡聲討練民兵爲犄角發曠騎爲游軍畫圻固封堅壁  
清野駕央製陣指枉矢以鋒摧羸子名軍望靈旗而膽

落準備焦原撲燎射梁楚之黃星正逢天塹揚波晦東  
南之紫氣輸情通款甘爐火以乞憐助虐增驕怙輔車  
而自固其意則市中假虎其形則桀上連雞彼儼爲响  
沫之涸鱗此實作兩端之首鼠雲麾壓壘彈羽張羅乃  
指斗而誓天願捧韉而伏地劉鋹執挺慣作甘言孟獲  
還營仍藏辛螫捐埋多變反噬孤恩入金鑑而難欺振  
靈夔而決戰知我軍如羅掩雉急則抱馬而歸誠知賊  
勢如韉繫鷹緩則增陴而善背焚巢可待不容鼓子之  
降解網已寬終正三危之罪起雲中之故守將韓厥之  
新軍騰組練而接陰殷析鞞而聯響鳳陽城雌軍奪氣

一丸難封臨淮關大將懸權八面受敵千羣代馬振批  
亢之勢於曹南二廣楚師成折首之勦於境外布成勝  
局砥就神鋒徒以吳越一星未清餘沴文昌上將尤急  
攻堅如劉裕北伐而海寇內訌如李晟收京而懷光議  
後奔南備北議守謀攻致僵蹙之秘蓁延營魂於漏刻  
丹浦之神旌方展待戮九嬰蒼梧之僊馭難攀空還八  
駿 皇上迪光纂葉襲慶提釐誓師而日月照臨卜將  
而星辰感會密須車鼓震豐水之聲威呂伋干戈奉南  
門之號令有娥綏祐爰基桓撥之規開母鐫華曾贊平  
成之略元戎申命天居襲行西平則繡帽臨軍任城則

黃鬚表勇黃閒青角開二十石之神弓紫燕紅陽分八  
千人爲驃騎碣磔礮發崑岡烈石之聲子母銃然湯谷  
流金之燄馬中赤兔天上將軍曳落河絕地而飛髑髏  
臺切雲而起高頰統九十總管嚴若負霜樊噲禽十三  
將軍迅於沃雪礮投卵碎一戰降七萬人弩疾縞穿終  
宵馳三百里雖落星芒赤竟完馬革之忠而沸海波紅  
盡拔鯨牙之刺星流波迸幕捲巢熏蓋賊之精銳皆亡  
而賊之腹心已潰函車獸獵旣無可負之嶠失水魚窮  
姑躍已焦之鼎遂乃跳踉河沛奔突燕齊西過漢中東  
窮海表前行副騎後乘鹽尸灰不灌而重然沙以流而



善走于時樓船下瀨已報平吳旗鼓出陘并兵擊楚慶  
緒以稽誅之孽種惡木生槎蜚廉以逋竄之餘生隙光  
因熱蛇身軼首判東部西部以分流龍翼雙飛射左甄  
右甄而進討獬子貍貍子獾世濟其凶句兵掉刺兵搏  
人自爲戰畫鴻溝之長塹難制觸藩移赤堇之純鉤竟  
窮補履將來萬福風聲播草木之名軍有臨淮營壘改  
旌旗之色上金城之戰略扼玉壁之要衝開偃月之營  
置撒星之陣霜鋌透甲有二丈五尺之纒矛火器連珠  
如一發十枝之神弩歎山欽野搜鐵騎於園中陰雷陽  
開覆醢雞於甕底迸竄過穆陵關下鼠入角端追奔到

陽主祠邊豆銜牛口囊沙秘計渡淮飛韓信之軍閒道  
奇兵入海失田橫之路醜類殲旃於劇縣若網絕流元  
凶遇伏於高郵如杵投曰凡此奏膚之效悉由廣運之  
神然而淮陽雖就救安關內尙煩獮薶方擬馬隆之西  
討適逢項羽之東歸卜竇充翦滅之相仍聞騰遂益兵  
而輒喜驛騷三輔汎濫九河 皇上知殘賊之貫盈戒  
遷延之師老虎符趣戰龍武發兵五諸侯伐楚出關十  
餘壁臨河救趙建蕭鈇以發艾秉義燧以銷冰畫地爲  
牢因河爲洫一斥一堠高關羊馬之牆四正四隅寬布  
烏蛇之陣蟻旋磨上兵十則圍鼠闕穴中人百其勇戈

船截浦望楊素若江神刀雨飛空呼高昂爲地虎觸機  
落羽蹈穽摧牙驗鼻死俘捽頭生致潰逃放仗掌拒膏  
鋒惟勝殘久惻於皇情故祐順兼滋乎天贊驅灌壇之  
風雨三日爲霖決淮堰之蛟螭百川到海冰蠋擊鼓龍  
伯揚麾左陷澤中右縛鼓下木罌難渡真看鼉令浮尸  
血杵同漂終使楚囚流漢參旂河鼓高臨洗甲之銀潢  
黃道天街滅盡如旗之蜚霧竊惟此賊本同草竊素鮮  
籌謀宜冠以無賴之名絕不作白頭之計以視弄兵桂  
管則狼臙并廢冠裳較之攘據石頭則天險尙無衣帶  
然其眾如馬牛之量谷其凶如蝨蟻之殘苗堅城不攻

梟鋒莫挫得地不守鹿角難圍鶻有九頭殲其魁而黨  
不滅蟲生百足擊其尾而首不知剽疾則卷旗滅竈而  
難追冥行則燒棧斷橋而莫遏故擊之視粵匪爲稍易  
滅之比粵匪爲尤難其始禍不過什伯爲羣及盪平豈  
止五十二戰自非璿圖祕運威柄高持縱勞奔命以曠  
時詎克掩羣而獲醜櫛髮鋤苗之候撤屯銷戟之辰鄒  
魯誦絃梁臺歌吹宋不塞夷庚之道陳不興堙井之波  
潁水濁而復清芍陂荒而還熟蔡州歸化方飽粥殽汴  
泗交流不聞鼓角宛市絕綠林之警壽陽無白馬之謠  
曲阜之東郊開申息之北門啟妖殲曹社弋雁無裁痕

靜濠梁觀魚知樂築譙東之精舍士盡讀書過苦縣之  
故墟人思問禮濯舊汙而變獷起周瘵以趣耕硤垢滌  
郵餐和飲化刑牲告祭如瞻原廟之衣冠瑑冊承歡加  
進璇宮之馨膳文克開而武應受知聖人繼述之心韋  
旣伐而顧亦平皆帝命不違之眷銘燕然而闡烈用攄  
宿憤於山陵縛劉闢而獻功益愴孝思於籩俎祁連造  
豕倦懷昔日之鼓鼙傳穴搜巖光輔清時之鼎鉉朱鷺  
饒吹金雞赦書敷蒲班爵之禮成杖杜勞還之詩作水  
衡之錢織室之錦駢香於賞軍銀青之綬金紫之魚汪  
淪於錫命鶚音革戾綸書安反側之心烏尾憐逋玉燭

照逃亡之屋歸德鎮建牙設戍虎在山而藜藿安雉河  
集置縣築城鴻有宅而桑麻殖人祇竝豫諧變交臻洵  
景煥於圖書將歲穀於史牒恭奉天語編述兵機踵累  
朝金鑰之成書代律署黃神之凱樂寫綈給札領局然  
藜油素積盈汗青斯歲分卷三百二十如畫地而圖成  
閱時十有八年如編珠而繩貫軒經龍首呂策豹發戊  
巳屯戍之章甲戌芻蕘之誓丙子火車之算庚辰水關  
之符先朝之所旣戡嗣服之所耆定南軍北軍之徵調  
東決西決之橫流羽林搏擊之場虎幟招降之地蛩駘  
所以分合狼貙所以化生白波黑山之殊名罔象夔羊

之異種羅蒐羣牒燭照一編考之而得中原肩髀之提  
綱循之而籌繡壤錯牙之控馭鑒之而足懷螢爝焚林  
之戒究之而可知蟻隄防潰之方覽之而念衝撓鋒鏑  
之艱難撫之而思煦養瘡痍之有道固將折箠笞以威  
八表信可敷衽席而奠兩儀宴清東海之鯨鯢震駭西  
傾之鳥鼠此 皇上所以運斗車而康神鼎禋社首而  
會文閭者也臣等叨預樞機忝司寫定銅籤報夜親聞  
咨儆於宵衣華蓋承霄更仰持盈於秋駕紀貞觀之政  
要才謝吳兢勒浯溪之頌聲懽侔元結春賞秋罰循元  
化以闕天河苞洛符罄愚忱而繪日從此葉榆畫斧譯

成四字提官行看葱嶺挂弓更簪三篇泰誓答揚光訓  
億年韜顓頊之文戈受此丕基萬國戴重華之玉斗臣  
等無任瞻天仰聖踴躍歡忭之至謹拜表恭進以聞



張文襄公全集

卷一百二十一

馬部

六

張文襄公全集卷一百二十一終

深縣盧詒孫校

張文襄公全集卷一百二十三

駢體文二

爲同年劉榕樓太史畫乞假歸娶圖徵詩啟

曲江春宴絲鞭開選壻之場玉京妝樓寶扇寫會仙之  
句錦雲奠雁宋金華首振妍辭蓮炬成昏吳祭酒繼標  
佳話近日隨園主人竊擬通天之表引惶卻扇之詩覈  
其題名蚤逾弱冠當時耆舊猶播篇章方今丹扆聖皇  
弱齡膺運綠衣進士英髦多賢同年景卿光君所芭庭  
陳君翼榕樓劉君會竝以綠鬢之華才參玉堂之妙選  
上清許讀中饋猶虛搖華采於雙魚增威儀於百兩不

圖同歲遂遇三人而榕樓則荀郎疑年獨居最少阮修  
未娶已有盛名尤爲榜上之花無愧人中之璧原夫驂  
鸞山水素號仙鄉雕龍門風代生才雋遂揚翹穎蚤飲  
香名拙詞而春藻橫飛振腕而金花細落一發中的千  
里不留陸士衡作賦之才李十郎登科之歲紅牋選勝  
爭喚狀頭畫省爲郎猶稱童子羊車過市羣果皆香塵  
尾當筵與手同色潘楊里閨夙諧玉杵之盟秦晉舟航  
待展青廬之禮天台洞口未飯胡麻女牀山中自棲鸞  
鳥聽宵鈴之采索誰侍添香擁官被之青縑輒吟獨旦  
兒家黃竹已成待嫁之箱郎號紫薇早辦通中之枕於

是驅車南邁衣錦晝行特寬休沐之期將舉共牢之典  
長卿還蜀橋頭之車馬趲趲簫史入秦樓上之鳳鸞歌  
舞雲英未嫁已見成名洛女妙年急須作髻玉煖九華  
之帳車浮五色之雲甌法酒以代瓊漿擷寶花而承華  
銚裁尙衣之錦段新製宵衣分天祿之藜光更然樺燭  
水衡十萬償黃姑之聘錢史牘三千助玉臺之新詠而  
況白華孝子二老俱存黑頭公卿初枕已上澣淪親奉  
視膳偕行君舅君姑齊歌婦豔輦絲輦革猶是兒嬉洵  
文苑之美談極人倫之佳境茲者寫之縑素廣乞琳瑯  
所望十色蜀牋三品湘管六朝儷體五字雙聲藉青門

祖道之篇爲金屋催妝之句金縷製曲宜賀新郎黃絹  
摘詞都題幼婦今日花開及第緩緩言歸明年春滿皇  
州雙雙俱至晨修眉史探銀管於皁囊夕校祕文暈脂  
香於粉盃劉公幹平視無罪還須曲恕眾賓繁休伯定  
情有詩定許傳觀我輩

馮萃亭宮保七十壽序

蓋聞至壽者參旗鳥翼武功列於星辰延年者火棗丹  
沙靈藥產於嶺海是以赤松黃石以兵法而得仙祝融  
鸞熊惟南方爲多壽則有勛書玉策福建金提締造應  
乎風雷精氣鍾於河岳公孫儒將南宮圖大樹之容奉

世邊材西域定莎車之亂九天主瓚頒爲筵上觥觥八  
陣風雲卽是鼎中龍虎如我萃亭宮保其人也公杜陵  
世德甯越名宗當販繒扣角之時具食肉封侯之相陰  
陽占候不學而能兵法璣鈴動與古會潢池俶擾炎海  
沸騰漁蜚揭竿尙墟篝火於是蒼頭特起聖面誅豪君  
子六千親酌義臣之酒奇材五百橫吹延伯之笳驍騰  
則鶻入鷁羣紀律則師過枕上枌榆弭患桂管知名提  
一旅而過江出六奇而爲將時則金陵寇老劫等蠱沙  
鐵甕城墟危如燕幕鎮江者南徐形勝北府勁兵介江  
海之要衝關南北之全局公登陴斷布析米量沙禁佛

貍之飲江爲老羆之當道負眊健關分兵襲朱雀之航  
飛樅橫行截賊過大儀之口九攻九拒空舞梯衝三絕  
三通遂膺節鉞蓋粵將自張忠武以後惟公神鋒颯發  
師律山嚴克紹前光上邀特達如韋孝寬之守玉壁不  
藉鄰援比張中丞之扼睢陽終成保障論者謂湘淮英  
彥江皖肅清犄角之勞公無讓焉洎乎汗馬酬勲驂鸞  
作鎮山連象郡伏莽猶多水下牂牁頽波未息初平越  
寇繼殄黔苗赤白探丸務窮鼠穴青藍有號盡燕鴟林  
蓋自公提督粵西以來外寇內訌以次平定廿年開闢  
三度出關簫勺羣凶靜山城之桴鼓隄官隄構播蠻語

之謳歌猛虎在而藜藿安佩犢稀而田禾熟於時河海  
清宴朝野歡娛寫止足之沖懷援還兵之古典玉關常  
閉何勞馬武之書北平歸來且作灞陵之醉雖復部勒  
江東之子弟保完通德之鄉閭方且謂賜金以娛老臣  
兵事付之兒輩矣豈意旄頭忽動蝸角終迷白雉愆朝  
貢之期蒼鵝兆兵戎之衅吞噬我屬國蕩搖我邊疆燄  
熾蚩旌怒揮湯斧之洞來持旄節遽聽鼓鼙碧海羣飛  
赤囊旁午艤艫走舸往來交廣之門庭魑魅游光呼嘯  
閩江之堂輿鯢身鹿耳有累卵之危黃浦朱方無重扃  
之固恭承廟算命出奇兵審水攻陸戰之短長用圍魏



救趙之計畫數先朝之宿將惟充國可以平羌勒舊部  
之鄉兵知廉頗正思用趙一封朝奏五道出師公植髮  
衝冠臨餐投袂一呼而壯士集十日而大軍行時則亭  
障一空關門不失國人望歲免胄而前漢將從天鳴鐘  
而下申嚴軍律重騰蒼兕之呼收合散亡頓集白狼之  
部中流一柱識亞夫爲眞將軍萬里長城拜子儀爲副  
元帥出輕兵以嘗敵築堅壘以當衝遂領曳落河之鋒  
大合關前隘之戰算房虛星昴之日慘澹妖書以禮拜  
前一日  
戰約占箕畢翼軫之風縱橫火隊公鞮刀自誓芒履先登  
冒如星如電之彈丸鳴疑鬼疑神之鼓角始則摧其堅

陣巨礮開花繼乃撓以短兵殺人如草十伏竝起兩甄  
齊鳴殪彼大酋燿其醜類鉅鹿之戰冠十餘壁諸侯之  
兵背嵬一軍殲二十軍拐子之馬再戰而文淵克三戰  
而諒山平象馬列於俘纍輦壺出於魑髻仁貴入扶餘  
國送款者四十城思力破薛延陀追奔者六百里由觀  
音橋而收長慶鳥下虛弦數北甯省以至山西烏留空  
幕閫外乘迅雷之勢誓復藩封海西來飛電之音遽成  
款議雖黃龍痛飲尙鬱忠肝而赤馬名都永禡虜魄蓋  
自道光庚子訂約以後光緒甲申用兵以來祆神肆其  
跳踉老將習爲持重從未聞張我撻伐蹙彼游魂今則

如火炳蓬若風捲籜天戈有赫朝廷以惟斷而成功露

布傳觀天下悟和戎爲非計圖其戰狀鄂公之貌若神

上海畫公戰圖

活我邊氓宗澤之親如父

越人呼公爲翁馮

疆天王之

戎索銅柱標題旌元老之壯猷青宮寅亮此所由文通

武達爲憲於萬邦殊禮世恩冠絕於羣帥者矣重以金

湯保泰玉暘防邊乃命公擁駟馬以還鄉建六牙以鎮

海固宜軍書整暇晚節優游撰杖相從踞牀坐嘯迺瓊

管一役復起視師瘴海如湯軍容如火皐雲輩出帳下

健兒懇愿齊驅膝前將種蓋生黎歧黎諸崗地三光不

照樹有鄧林五丁未開梯盡秦棧怪蟲雄虺淫雨盲風

公十決無前四隅竝進裹瓊魚貫軍不失期曳足鳶飛  
士無退志搜蠶蠱蛇祥之孽共血軒戈赦雕題鑠耳之  
頑仍恢湯網磨駭鳥散陰雪陽開旣奏擒渠掃穴之勛  
更爲拔木通道之計開十字路通五指山成海忠介未  
成之功平俞大猷未平之寇五氣六沴莫搜太白之鋒  
旌八達九達咸襲漢家之冠帶辰居十二禁妖鳥而無  
神清酒一鍾盟雙龍而不犯丞相有攻心之道將軍傳  
去病之名舉凡福應之龐鴻莫非精誠所通感從此鳥  
言蛇種盡識官儀龍館熊居都供田賦伐百圍之古木  
文梓青牛貢三品之精金黃鑠白釧內無棄壤訖北戶

之聲靈外有强鄰鞏南滇之藩衛以視昔人之斷籐下  
峽定笮開邊絜效論功侔乎遠矣維公獨秉赤忠素標  
青節攻城克敵并無滿篋之圖書開府臨邊不蓄入家  
之金馬中興諸將似此希聞若夫內行純和淵懷惇大  
早廢蓼莪之詠晚聯棠棣之歡指囷則瑜肅之風期投  
漆則雷陳之氣誼雅量高致從之游者若飲醇醪直道  
正言與之交者如獲藥石是又古賢之軌範非徒名將  
之神威已茲者神降崧高日躔鶉火老人星見聿占益  
壽之祥黎母山深新采長生之藥河圖度紀爲世啟符  
天府上珍錫公純嘏蘭玉舞綵都佩金魚闥門知兵齊

張錦繖拜滇南之恩命六詔歡呼播海外之威名四夷  
問訊之洞敬公有堅剛之德契若針磁爲公賦偕作之  
詩誼同袍澤論功嶺外遠齊伏波橫海之名建節鄉邦  
兼有畫錦鳴珂之美功德比曹武惠僅殊七日之生辰  
封爵如齊太公翹祝九旬之榮顯

陳子良封公六十壽序

懿夫喬木百年堂構綿其貞算朱草三秀庭階蔚爲國  
華際昌洽之盛期爲鍾毓所希有史紀德星輝映千里  
緯徵神霧棣通八垓適逢攬揆之辰合取導揚之美彼  
黃綺高矣而邁軸則野蒼商顯矣而鈞輔則勞是則地

行脩到何與人倫天壽相期徒誇朝貴必也鼎鐘閔閔  
冠冕文章可仕可止訓稟乎聖中得壽得名詣幾於純  
孝而曾閔行備不居達官荀陳道尊家有令器如我子  
良陳封公者可得而稱焉公席貂珥之清芬挺珠庭之  
秀氣弧在門而君恩到賜鯉同榮經起草而孺子知童  
烏遜器維時令祖司冠公總治秋官尊人方伯公馳驅  
夏甸公則弱齡傳硯綺歲學詩小同治經直接高密孟  
堅脩史繼起叔皮蜚鳳穴之英聲馳駿衢之逸足其侍  
母夫人疾也鍼灸親試庾沙彌分痛自甘臂肉重剖王  
友貞裹創而侍比之圭璧請代用至誠以感神揆諸髮

膚不傷實反經而合道春暉旣逝問四牡其誰將孝水  
頓枯撫重茵而不坐捧輿願渺誓墓文成蓋自內艱以  
來公已無仕宦之志矣雖復攀桂秋風看花春苑棘司  
觀政祖武能繩蕭律研精朝章願學西曹佳吏負藉甚  
之時名東閣郎君抗歸與之遠志雲端黃鵠天際朱霞  
蓋以嘗考叔之羹歸無可遺奉曾元之酒家有餘歡從  
此抽朝簪舞采服書捐城旦賦撰靈光隨篠蕩之廻翔  
取褰綸而浣濯方伯公顧而樂之每當放衙小愒輒置  
文度於懷中泊乎引疾歸田益賞斜川於世外浮雲縹  
緲愛日舒長孺子情肫要官思熟其少而辭榮盡孝有



如此者陸天隨自署散人陶宏景不交外物而五際之  
譽羣彥趨之而如流六闕之門長官過之而必式觀其  
擔當義舉專幽仁心踰海泛舟鴻磬安堵連鄉禦寇豕  
突摧牙卒能遂志澄清益復殫心利濟李士謙竭資爇  
券騰歌頌於千家許文休後已先人贍饑寒於九族孝  
乎爲政仁者愛人匡時之略已獎於絲綸嘉遯之懷仍  
安於林壑不營服玩獨好登臨謝康樂多紀游之詩許  
元度有濟勝之具仁智根乎本性高深遂其德機遠結  
古歡博蒐寶刻釋薛洪之祕本三體精研藏顧陸之遺  
珍百廚手署同時如何子貞太史吳子苾閣學相與辨

析古今評量紙墨小山之高頡頏無媿延陵之雅贈答  
交相往往雨中折巾時流競效雪夜放櫂高寄無傳聞  
名者驚爲神仙待澤者羣相尸祝其壯而樂善好古有  
如此者今夫決達人於明德之後者貞符也求忠臣於  
孝子之門者義教也公抱珪璋之德器擅黼黻之文章  
而乃蟬蛻世榮鴻冥物外炳燭勤脩於晚歲納楹屬望  
於後人伯潛閣學早步木天久陪香案政事治安之策  
殿陛動容論思獻納之篇都人傳寫瑞如鳴鳳威等神  
羊呼古弼爲筆頭公稱陸贄爲眞學士會昌直節本受  
教於忠公純伯蓋謨實濟美於文正于時入參日講出

駕星輶芷蘭同升桃李竝茂上下門生之句特美於陵  
大小夏侯之稱羣推桓郁帝心久眷海警俄聞夙知經  
緯之才特畀折衝之任移西江之駢節治南服之犀軍  
允文勞師激昂諸將士雅擊楫忼慨中流方將吐儒者  
干櫓之奇奏禁中頗牧之效而乃柳營乍啟萱蔭遽彫  
同甫之論方陳曲逆之奇未著是則大任將降動忍先  
經羣望所歸廻翔未至也若其忠於謀國勇於求才諸  
將失期李陵致敗危時薦士房琯無功繩墨森嚴何嘗  
於吏議江湖浩蕩終賴於明時而伯潛有斐詠詩无悶  
占易幽蘭芳蕙斯爲君子之貞白華絳趺爰得詩人之

樂吾知雞鳴不己虎氣終騰以六月假息之期治千秋  
不朽之業他日者秉黃髮之詒謀爲黑頭之公輔八公  
克敵東山激賞於兒曹新建策勳海日婆娑於林下惟  
此國楨之寄莫非庭誥之傳而況羣子能文諸孫接武  
得義得筆顏氏多才習禮習書仲華善教其老而教忠  
垂範有如此者之洞與伯潛曩在京朝同官侍從相勛  
古義何啻同聲自痛鮮民遜其一樂大澂與伯潛誼屬  
年家情均昆弟聞詩庭之緒論仰台斗之儀型茲者花  
甲初羸鞠泉正濫入高陽之里列笏盈牀啟平泉之莊  
添籌滿屋用是驅除世論汰削諛辭舍南榮福海之浮

夸述東觀儒林之雅操鶴尊香溢鴻朗函開招九曲之  
仙僊賞三山之秋色紀晁氏昭德編之盛貽厥子孫披  
歐公集古錄之文壽同金石

子青中堂五兄八十壽序

光緒十有六年恭遇 聖上二旬萬壽祝雍陳冊周成  
王加冠之辭長樂聞鐘漢文帝晨朝之蹕一時文昌上  
佐太極龐齡龍馬煥其精神鴛鴦綏其福祿而古族相  
國子青五兄適於其年七月秩開八旬輅曰耄之蕃籒  
襲大酺之義祉位尊元老繫時望者四朝祚錫天孫後  
秋朝者一日慈聖以垂簾舊輔授璽成勞福海壽山五

鳳翼鏤金之勝慈雲佛日雙鸞翔雕玉之聯朝廷仰秉  
姒徽眷言說命值魯侯之燕喜答天保以鹿鳴楊賜承  
貺於金錯之鉤孔光拜嘉於靈壽之杖則有烏衣羣從  
朱輪一門象笏積而牀高兕觥稱而堂遠合詞海屋寄  
祝京師將以副天庥聲家慶禮也夫其許國老成沂公  
早貴內長六曹之官外爲八州之督范希文知樞密之  
院西夏憚其甲兵寇平仲坐中書之堂北門倚爲鎖鑰  
進衍義之講聖德賴以開張食稽古之榮諸王奉爲教  
授以及敬輿之官學士稚圭之謝官僚金蓮撤而御座  
光分銅劍明而春坊字泐鳳池掌制絲綸待其論思螭

陞簪毫言對由其記注而且皇華厯賦玉尺前持星辰  
詞苑之軺風月都堂之壁書牙牌而磨盡記畫錦而非  
榮則且進推得此之由以致無窮之望可乎公方登拔  
萃旋入秋曹其時贈光祿公久列朝紳夙敦家誠老矣  
馮唐之郎署懷如鄧禹之閨門坐鮮空尊豪同置驛衣  
冠高會對父執而怡然金紫趨前爲兒曹而盍起厥後  
吳門被詔聞海旋移適因伯母太夫人旣毫憚行願言  
偕隱讓開府之表補循陔之詩遲著錄而歸田爲奉親  
而賃廡蘇臺春早披綵服於風前鄧尉梅多侍安興於  
雪後若夫敦同產之愛感終鮮之心語勉家肥歌酬季

舞岑文昭之出入無間於貨財韋元直之往還多同於  
臥起性情所印欄檻皆春往往遙致寸根互評異種會  
花前之客敘夜宴之詩幕府海棠活色入邊鸞之畫小  
山叢桂幽栖娛庾信之情萱草爲之忘憂常棣從而旣  
翕此其孝友之不可及者一也方公之爲講官也筆正  
微規蒿邪頓斥以勸華爲可致非仁義其何陳顧以帝  
統傳心學人入德蓋同原於性道宜端本於權輿先是  
康熙年間功令童試命題四書文外并課孝經性理等  
論將使因文見道就委溯源法至良義至備也至是復  
從論列重有修明遂詔學官再編令甲在昔蔡邕正石



經之字始立鴻都劉歆移太常之書卒興左氏以公方之侔乎遠矣其在河南學政任內亦以身居侍從職在輶軒憎赤帝之鵠濡昌言吏治發銀臺之馬遞直訴民艱旋申敕於曷臣實上聞於封事至於冠時循吏尙世大儒有慶彈冠多從推轂呂夷簡之揚包老韓魏公之薦歐陽天下稱爲知人朝士翕其相賀此其建言之不可及者二也有孚特簡卽撫是邦其時河南漕政之敝厯有年所名則以銓秸輸天庾之供實則以脂膏填縣門之壑察量益厲怨讟及於公家入廩無時朽蠹重其後罪父老有剜肉醫瘡之痛官吏以敲筋吸髓相嬉蓋

以兵燹之餘汗萊甫闢百畝田無從贏社閭嘗薪之費  
二千石亦且任嘆息愁恨之聲則以爲欲恤農艱先輕  
租契若從民便任準緡錢爰奏仿胡文忠公治鄂章程  
易本色之徵定折漕之法春秋市價旣平糶賣之情道  
路輕齎并省挽輸之累且地當孔道人苦繁徭其有使  
者張廬重臣按部代北相之從客館舍喧闐義成侯之  
過軍酒漿絡繹官府方下人畜皆驚津梁多除道之夫  
昏夜有捉人之吏鼓難記里逾堠譏而星馳蠲則在桑  
枕輶端而露宿甚者行役之久至轡車騎而歸乃復均  
其程期定其顧直三品區踐更之令四郊罷母馬之亭

民困一蘇頌聲遂浹此其吏治之不可及者三也甫甦  
溝瘠復迫寇警時則夕烽明於官渡插羽入於南宮受  
事後統所部出駐汝甯府陳許節度邵陽隸其指揮孟  
津將軍河內連其犄角汝陽擒首陳大喜者柔龍多馬  
之賊黑山飛燕之名方堅守尙店分踞平輿各砦嚴逾  
夾寨固甚易京公指畫輿圖部分幡校皆至如植番休  
而前鏟其羊馬之牆填其蚰蜒之塹韓世忠割氈夜獻  
史萬頃拔柵先登妖鳥傾巢奇鶻授首次年移師南陽  
勦擒南召之馬山口七戰皆捷挈功則武鄉七擒之效  
非多識期則小雅三捷之數爲少當時僧忠武王代秉

鉞之行處絕膺之位而其過豫也獨以斯人長德此邦  
善政約毗賀突鐵騎之隊有戒宿留霽蘭陵王銅具之  
顏與論破陣督漕之日奏擒捻首賴文光一役功由選  
將事始發蹤首馳捷奏於紅旗特飭影纓以翠羽於時  
前浙江提督歐陽健飛軍門以草木威名之舊隸囊鞬  
上謁之班力言於朝洊陟此位甲申之秋法夷犯澗統  
樓船濯卒之隊扼舟山舊戍之衝霆擊颶輪星馳驛報  
莎車振旅賀龍額之得人佛狸銷鋒應卯年之佳讖折  
衝千里之外樹木十年以前此其勲績之不可及者四  
也吳中移節之時適承密網之後則有前撫某公者政

繁衡石術寄銛筭掾史三寸之衣令其去地議曹十五  
之白徧於屬城有懲虎苛相率狼顧公乃申獄市不擾  
之戒本斲珣爲樸之心未能按人無聞榜吏州平幼宰  
下教而使言粟邑頻陽移官而遂治不必恣隔牆之歌  
呼徇臥閣之優游而咸能共矢不欺有聞報最治具旣  
舉民氣大和池臺修而鐘鼓歡娛亭堠靜而雞豚孳育  
列廛燈火宵分多夜作之聲逆旅衣裝道上鮮官攤之  
阻亦或偶辭簿領小集賓僚修禊滄浪之亭望春闔閭  
之市葛疆愛將從山簡於習池鄒湛諸賢陪羊侯於峴  
首益知龍門賞寫之札南樓坐月之牀爲政風流無疑

曩昔此其政體之不可及者五也今東撫張朗齋宮保  
昔在豫軍久著戰績尹翁歸兼備文武無憚問辭晉卻  
穀夙敦詩書足爲謀帥虎頭燕領生涯早謝於班傭鐵  
肋銅筋意氣益雄於秦士徒以起家軍旅頻歲兵閒遂  
被劉秩以曳落河之名加崔協以沒字碑之謗未免當  
歌慷慨對酒沈吟密有分疏優加倚任夸其露布授以  
陣圖至今還鄧羌司隸之官傳杜預左傳之癖有彰公  
道首賴一言宋軍門慶本在他軍方從結髮適告垂翅  
將對北平之簿遽拭獨孤之鑑朝聞申救夕許馳驅將  
涅背以効忠更指心而矢報李臨淮之入陣自備鞞刀

高季式之還營滿盛袖血卒能埽除青犢迴幹紅羊談  
笑復雁門之踦颯爽入淩煙之畫黑稍將軍之壁壘河  
上馳聲梨花槍手之強梁淮西滅跡論者謂秦繆之原  
一眚鮑叔之知三北不是過矣此其知人之不可及者  
六也旣畢養事本矢終隱屢以非熊在夢鳴鳥將聞爰  
仍命於歸周庸再傳於入雒於是甫侯司寇驃騎典兵  
情要則吏部之掌銓繁劇則度支之主計唐階參政實  
分庶務之猷漢策延登遂正三公之位自是進居省府  
入綜機庭定謀捷於推枰畫策許其借箸無日不瞻顏  
晝接抒藻賡歌宣室從而受釐延英開而賜對聽鈞天

之廣樂頌德韶韻張樂水之行朝次班周召龍光拜後  
耶官承父任之恩鑾輅扈行騎服染御袍之色高禩方  
祝呂公著已躋豫擇之階玉署傳觀蘇易簡疊資親揮  
之翰而沙堤歸仗溫樹含春補牘者方有續陳執經者  
從而問字用能扇馨桂岫茂葉桐階當少男補博士之  
員正老子入泮宮之歲霓裳小序花甲初周蕭延紹封  
位次尙仍第一和凝授鉢登庸早兆十三德門本其家  
傳藝苑詫爲前定此其恩遇之不可及者七也公兩乘  
秋槎一督學校再校貢士一總南宮至於評明堂火珠  
之詩讀江都制策之對丹毫疊及紅勒無苛鑒別之精



如懸衡撝采之富如觀劍以故笥班林立藥籠春多家  
翻織錦之機雲霞散采手種成陰之樹槐棘分班當年  
沆瀣之門生大半貞元之朝士若乃會昌制誥之集慶  
歷聖德之詩興元大赦之書浯溪中興之頌莫不交推  
燕筆共仰韓碑游藝多通書畫復媿郇公五雲之體潤  
色於揮毫謝傅一邱之心寄懷於著墨別饒世外之致  
時荷禁中之褻以視論光獻飛白之派溯源昭陵進楚  
江清曉之圖見賞德壽者諒同精妙未竝遭逢所居私  
第縹緗羅列金薤紛陳入者如游寶晉之齋登清閼之  
閣也嘗因夢徵鐫有吳質前身小印招明月而入懷記

後園之同乘圓澤三生之石有此前因鄴侯一品之衣  
方茲仙骨此其文望之不可及者八也眷言平生最篤  
師友恆謂速升堂室始增采而益觀得列門牆兼感恩  
於知己嘗迎金可亭學士陳琴生觀察於河南軍幕藍  
輿道左絳帳行聞戎機閒以投壺禮敬同於結轡博陵  
在職無荒陸氏之莊元獻相逢遂啟宛邱之宴亦有故  
家葛峽同學綈袍庀材假筦庫之司握手設舊交之位  
埽門魏勃邂逅而承顏給札曹邱閒關而道地益見愛  
才之篤說士之甘焉宜夫冥符契其德心積戀生其遙  
感華陰童子贈白玉之三環幽部吏人致青泥之一襪

此其風義之不可及者九也公波深千尺氣備四時不講學而有宋儒去矜釋忿之功不清談而得晉人情恕理遣之旨陳仲弓置身萬仞莫測高深穆大尉厯職累朝難尋愠喜有容本諸秦誓協恭準於皋謨是以九重屢聞長者之言同列謂得大臣之體被光風於門下入坐皆春挹雅量於軍中飲醪自醉中間選平泉之石營午橋之莊偶賦遂初直同未貴其治家也師柳公綽之法其居鄉也得夏原吉之風其入里有若石建之恭其待下有若王旦之恕杜陵社日相從泥飲之人徐勉座中時有夜談之客而賜金贍族租麥周人鮒訴無聞鶴

精已割言觀自奉之菲蓋出於性之安祭太僕之筍衣  
曾無兼副高令公之廚饌不廢鹽齏帽箱或怯於當風  
晶飯無辭於治具以言功名如彼而和易顧如此祿位  
如彼而儉約又如此信乎厚德因之載福美意足以延  
年此其德量之不可及者十也考本朝由大魁秉政者  
年閱二百有餘公盈十人之數最著者風節則韓城福  
祉則吳縣十者兼之無弗及也是以走卒知其名氏外  
夷問其起居每當禁樹星稀火城春曉上龍尾青花之  
道報雞人絳幘之籌晴雪照其鬚眉天風健其步履早  
朝待漏見旦復旦之祥元會臨軒聞煙非煙之對盛時

人瑞平世地行宜統封胡羯末之倫同申園綺松喬之  
祝之洞譽分珠樹學共青箱傳家聆塵尾之談出手賞  
雞碑之慧綺歲春明之夢聽雨相從頻年夏縵之移看  
雲有憶茲者酈泉菊熟度索桃開遙飛金谷之觴重檢  
玉堂之譜雲龍先後差謂隨肩候雁寒暄久疎撫背集  
中華夢淵源各本趨庭車後韋輪禮數獨推過闕信小  
宋之從公序相讓於狀頭記東阿之寄任城相期於黃  
髮方今嵩呼萬歲星朗六符黃鵠下於太液之池金芝  
產於函德之殿際有道之佩黻爲同聲之壘簾治內治  
外各有其職思俾熾俾昌鈞承於波及所願茱萸永健

芍藥長春協魯頌之作朋師衛武之耄學祝釐聖節誦  
嘉謨於金鑑之篇延慶後昆衍清德於鳴珂之里

李少荃傅相七十壽序

皇帝御極之十有八年八紘判治百度貞明維時居首  
揆者實惟傅相合肥公文長綸閣武鎮畿疆內掌海官  
外綜商政有一德之美兼四事之勤贊成盛化有自來  
矣是年正月五日爲公七旬嶽降之辰聖上以公之  
純嘏爲國之禎祥尙齒尊賢頒恩錫謨天章魏煥珍物  
便蕃禮也孔光俊乂之臣錫之靈壽楊彪賓客之禮冠  
以進賢矧迺任遇四朝功在兩社受茲介福僉曰惟宜

於時海內人士擇言祝釐凡中興征討之勳歷鎮循良  
之治家門列戟之盛夙夜補袞之勞赫赫明明歌詠未  
艾聞者耳熟書者腕脫備哉粲爛無待重陳之洞獨惟  
聖朝龍燭天表鼇扶地維超邁九皇亭毒萬彙羊胛夜  
熟聲教及於寒門鳥羽山齊威稜逾於弱水熱入達法  
采自靈臺耆闍峴山編爲亭堠咸鏡道築王人之館而  
龍伯東通南懷仁列朝請之官而青島西至圖理琛奉  
使而北登悉畢爾之山廓爾喀來庭而南窮五天竺之  
海以及馬國象國之君長使鹿使犬之種人靡不各效  
梯航願祠冠帶蓋疆索極廣故抵四裔以爲鄰牯冒至

宏故總九垓而爲界在昔金壺來秦紕厨通漢唐行景  
教元記西遊不過埵列外篇偶通單使要荒之義略取  
維婁流求之名存乎疑似至我朝而乾坤既定遂生六  
爻之旁通陰陽旣調大啟四方之和會屬以中原有事  
重譯滋多飛蓬賓來度索神渺烏香異藥標勝朝職貢  
之名螺旋飛輪竊上古蠡舟之製梵釋佉盧之變體別  
爲蠟頂一書婆羅天方之支流遂傳摩醯十戒烏章朶  
幟飛揚於重瀛王面銀錢充牣於互市知唐桑艾隄官  
之所不能名撐犁孤塗舌人之所不能盡國家義以征  
不讎仁以篤元同盟聘交通經權互用當時老成謀國



如胡文忠曾文正左文襄諸公每謂內憂未弭外懼尤深宜奮御天自強之神功亟講設險守國之治術特以潢池騰沸先務戡劉牖戶經營宜圖閒暇或知及之而未得爲或甫爲之而未能竟蘊此遠猷以待能者公旣以一身兼南征北伐之功遂爲九州建內修外攘之策高掌遠蹠眇虛澄心以爲天子守在四夷經傳之偉略聖人學於萬物儒家之精言管仲匡主懷遠是先子產養民救時爲務遂乃擴騶衍之說訂伯益之圖來遠交鄰義衷乎孔孟詰戎表海訓本乎成康文附武威智創巧述牢籠八極經緯萬端詩曰惠此中國又曰揉此萬

邦易曰通其變使民不倦神而化之使民宜之此之謂也爰就公削平髮捻以後兼綜南北洋大臣以來二十年間凡所措置洋務海防諸大端足以弼成我國家太平無疆之休者詮次其說以告惇史夫從古天驕之性不懷德而畏威廟算之功惟有備而無患往者西焚梗道東鯨跳波道光咸豐兩朝天威赫怒於上羣帥戮力於下徒以王師之義殺而不殘短兵之形五不當一有武不究末窮京觀之封養時是遵率用羈縻之義要知蚩尤造戈戟之利軒帝未銷肅慎貢楛柝之珍周廷不棄東海湛盧之劍秦王聞而願求西戎切玉之刀穆滿

得而寶用歷觀連弩旣古改神臂而名弓旂石難飛變  
霹靂而用火佛郎巧製元初用之於西傾紅衣神物明  
季得之於南海讀盤庚之誥器非舊而求新繹穰苴之  
書兵以長而衛短公於是教南北各軍用外國連珠槍  
後門礮然而楚材晉用越甲吳求喜則易事通功怒則  
閉關絕市國有利器物有殊能豈宜仰人鼻息以爲常  
能竭心思而不用天產地產莫富於中華首出之區機  
事機心未足議聖人考工之事演徑一圍三股四弦五  
之術器以道成萃七陶八冶九柯十匠之能巧由習出  
張衡能創新法地動成儀李治別有精思海圜測鏡觀

其分曹授藝計晷程功樞質負重則大如函牛之鼎椎  
鑿入微則小於刻猴之削黑氣青氣白氣之既盡如燒  
九轉之丹大輪小輪均輪之相銜如測五星之度輕以  
重御故斤削鼻而不傷平與弧殊故衡鄉眉而恰盡分  
之燦如繁星合之不差累黍按圖效技則廬弓函鋪夫  
人而能爲物備器成則戰守攻圍無施而不可公於是  
設上海天津諸機器製造局軍實旣充守具宜固冰關  
西之壘魏武囊沙錐統萬之城赫連烝土欲扼要害先  
審堅瑕土取塞門德而來天賜晉塊礮有克虜伯之號  
江斷狸年則有露處爲奇犄角取勢山斗入海臺上通

天設伏兵於羊馬之牆藏軍資於蟄蟲之戶八面受敵  
則如斗運中央左右旋抽則如月闕半暈旁隕四下故  
受攻擊而不傷直角相交故合首尾而相應順八風而  
列八陣循環無端藏九地而攻九天高下皆準易京十  
丈受降三城方斯蔑矣公於是築北洋各海口新式礮  
臺若乃蒼兕九頭黃龍五采自通島國已設船官鳩楫  
師於閩粵招槎客於星漢飛雲蓋海轉下界之金輪馭  
氣排空徹相風之綰羽特是用木用革止宜吳頭楚尾  
之地爲雷爲火將有焚旂脫輻之占苟不介而先馳如  
以礮而投卵是知犀甲七屬不如百鍊之鋼陽火十烏

難鑠六州之鐵行則爲陣止則爲營礮火如雷如霆電  
燈如日如月鯨浪擊三千里難桅其行鷁船容二千人  
猶嫌其隘破成樓之蜃霧遠避旌旗禦焚輪之焱風無  
傷毛髮蓋李冰能變化方能戰離堆之江神禹鼎象物  
形乃可辟山林之魑魅將以南援儋耳東渡鯢身來往  
天池有如堂闔公於是購造鐵甲兵輪船自古將材必  
由學校屠龍可習暴虎無庸司馬法乃禮家之精飛將  
軍非常勝之策彼夫荆尸授子有象物之百官句踐習  
流有臨陣之君子牧野用巴渝之舞鄢陵稱楚廣之車  
苟戎事所取資亦智者所必察蓋泰西諸國習於戰爭

視爲耕鑿百金養士七年教民車以行陸舟以行水習  
所用而不遷退無遽走進無速奔因好整而生暇畫圖  
爲初學入門之始技巧爲兵家四種之終揆其事器之  
相資實於書傳而有合亦猶程子觀僧飯而歎爲三代  
之威儀宣聖問官名而得諸四夷之君長日磬佐漢由  
余來戎宋人售漣統之方巫臣教乘車之戰齊力齊足  
合乎雅訓之言火器火輜參以格物之學力能穿札吹  
箭飛跋浪之魚氣可凌虛擊球鼓騰霄之羽靈奇悅惚  
雄富精研公於是設天津武備學堂若夫子午相乘則  
怒而生雷陰陽夾持則激而爲電誕謾竹書之語繞斗

帝生滑稽神異之經投壺天笑孰若陽泉持論定爲熱  
氣之言冲遠疏經申以陽光之說則有黠賓應鐵黃帝  
司繩神於銅山之應洛鐘捷於鄧林之追日馭森森表  
道建木非測景之竿颯颯飛書畫革效旁行之字子卿  
裂帛匪藉歸鴻曲端點軍無勞縱鴿老聃所謂不出戶  
而知天下佛氏所謂一刹那而周大千每當王命急宣  
朝發白帝捷書坐待夜到甘泉是之謂戰勝於廟堂洵  
可以明見乎萬里公於是設十九省電綫之報禹粒烝  
民先修懋遷之政蠡霸越國乃著陶朱之書官山海而  
齊業強運江淮而唐用足富鄰有戒利孔防多自大秦



通西海之舟波斯列唐京之肆犴糠及米遂浮海以入  
江附尾而行竟反客而爲主欲塞卮漏自索衣珠吳粳  
轉而南來蜀麻通而西下蜚人泉客收失職之間民天  
塹谷王保自然之地險推而行之將使鄭商載乘韋以  
市周郊蜀賈販卽杖而適大夏羽毛齒革波及於鄰疆  
幪布賤錢山集於外府滂沛四達轉輸無窮不惟籠神  
州自有之利權并可挽百川到海之逝水公於是設中  
外輪船招商局聞之天地爲爐陰陽爲炭范金合土非  
火不成釜爨鐵耕非熟不食賤之則如泥沙貴之則如  
菽粟東方握地誤疑昆明劫後之灰蘇軾上書擬煉徐

州山中之鐵然而少君作炭力士開山九仞之功及泉而止一夫之力遇石而窮粵乃測度鉤深發機引重達淵泉之臭來空穴之風青澗百五十尺而無停工元君七十二鑽而無遺策巽木上水飲以虹蜺之梁鑿井見泥轉以鹿盧之躡車不及載谷不勝量天帝代裝風伯持橐作金五十斤不敵其利鼓鑄三十鑪不患其多良以冀土早寒衛薪不屬今則地藏其熱天輟其冬莊生傳薪而不窮虞詡增竈而不減冰雪千里不吹律而谷溫煙火萬家不樵蘇而士飽至於金工利用海舶取求富國贍軍猶其次矣公於是立開平煤鑛公司穀梁論

世謂視遠未必察形營平籌邊謂百聞不如一見今欲  
盧牟兩極提控五洲則必如朱育通三十六國語言元  
獎得六百餘部經典惟是拘墟難化鑿空殊多坤輿外  
紀有誕詞西洋典錄多陋語邇來魏圖海國徐志瀛寰  
亦皆創始之椎輪未切日新之時局洲名爲歐阿澳美  
分求貉隸之官字母有烏額衣挨更廣龍龕之鑑變白  
博父紀月之法專候太陽緋藍皮書記事之文不淆新  
報夫然後風土優劣國勢盈虛步算專門格物妙悟兵  
家實用工作巧思審尺寸之短長知彼己之宜忌乘障  
躡夷藉以折衝張旆使臣無難潤色日出日入之語免

謾侮於來書地動地靜之談不眩迷於異說知其情狀  
歸我彌綸公於是開上海廣方言館格致書院譯外國  
諸書周官約劑書於丹圖晉侯誓詞有如白水所以昭  
明大信永固邦交板楯罰黃龍閣中列石單于刑白馬  
諾水告天至今而海外同盟極合從連衡之利害行人  
將命爲兵車衣裳之樞機璧假田而鄭渝平璽傳書而  
魯追使子路證鼎信於片言吐蕃勒碑書分三體誠以  
口岸租界之雜處如蟻性之趨羶卡倫鄂博之荒遼如  
犬牙之交錯責言無已口敵血而未乾狙詐難窮璧睨  
柱而欲碎或則鼃鼃與處頓棄成言或則連雞俱棲牽

連同類要使權場不擾甌脫息爭商於防六里之欺臚  
列左證鄭公爭一字之義剖析毫芒數踐土之前文梟  
馳騁爭爲長雄之辯索汶陽之侵地夾谷傳互相刼制  
之方交孚則讀牲上之舊書操縱則增傳家之變例從  
此萬邦玉帛可以執簡而爭絕代輶軒可以循轍而守  
傳不云乎信者國之寶也公於是纂成條約類編三十  
卷刊行械櫟周雅鎬京已有舟師昆明漢池西都先習  
水戰嘉禾北伐曾泛樂浪楊僕東征亦浮渤海雖諸戎  
勢面自明保塞之誠而非族異心常在臥榻之側藉非  
深根固柢先扼析木之津上兵伐謀橫絕沃焦之海島

名對馬遠見亶洲神仙將號龍驤別立水軍都督則渭  
橋左輔易駭傳烽皮島孤軍空煩饋餉待敵於堂奧而  
不禦敵於藩籬未爲計之得也是惟衿喉黃腫鎖鑰青  
邱聯三韓爲外屏視榆關如枕席威海衛之水雷設而  
之采海市平大連灣之船塢成而旅順門庭固公於是  
贊廷議創設北洋海軍昔者持旛司南越裳之使不惑  
鳴鼓記里晉代之造無差聖如周公賢如謝傅豈矜技  
巧哉取適時用而已今玉門四萬里奇肱飛車廣輪十  
二分壺公縮地牡關北轄鐵籠冒田單之奔車幹別枝  
分金椎築秦皇之馳道塹山堙谷矯若龍游掣電奔雷

行如魚貫長蘆經始遼瀋踵成接軫分塗方行天下將  
使木牛流馬武鄉厭輪輓之遲赤驥盜驪造父失馳驅  
之度萬流奔越於日下百貨輻輳於交衢一旦有軍旅  
之事則朝發咸池夕宿崦嵫芻粟如飛而來將軍從天  
而下王道蕩平永無反側普天文軌從此來同公於是  
創造中國鐵路凡此諸大端兼包九流利賴百世內則  
使民挾其所習而漸收成務之功外則與敵共其所長  
而隱格猾夏之志以視古之身都將相職筦華戎虎皮  
甫納已賜歌鐘烏夷來同遠頒圭卣以徙戎爲自守上  
策以閉關爲中興遠謨平內地一州而輒謂鏡清寰海

閔農家一物而謬稱變理陰陽者廣狹洪纖莫平遠矣  
如之洞者館閣後進章句小儒適會多艱謬領一道所  
處江海四衝之地皆有樽俎交際之宜讀公章奏幸無  
河漢之驚覩公設施輒有符契之合遂欲砭訂愚頑冀  
以補苴罅漏百夫決拾覩善射而從風十駕驚駘隨良  
驥而思奮工商竝舉愧衛文布帛之寒酸藍筆初開忘  
楚國山林之僻陋桓寬文士乃論鐵官元凱經生思營  
武庫雖度德量力地小不足以回旋而前步後趨山高  
豈禁於仰止是則爲桷細木皆因宋廬以成功學海百  
川益助滄溟之洪量者矣茲者風清黃圖月軌青陸斗



樞春轉知相公幹運之璇璣江漢波澄是元老舊時之  
疆里之洞等遙瞻駿極共祝休徵誦斜川五日之詩賡  
旱麓百福之頌合上台中台下台之朝列典型是資極  
紅海黑海黃海之殊邦起居致問康侯晝日宜受王母  
之蕃釐召公大年常臨燕國之福曜所願百齡錫壽傳  
張丞相柱史之方從茲四國畏威歸仲山甫銘功之鼎  
鐵如意頌

此明吏部尙書高邑趙忠毅公之故物也舊存河南布

政使任

至聖

縣邊君家今邊君之四公子水部郎中以

公之邦人敬爲頌曰東林之賢北學之良正色立朝彈

紆扶陽殘持計政善顏道昌制茲服物實資純剛上有

垂句

古侯切

以朴見長下有雅詞填金景行六書心畫遠

法史倉曲而不折威而不傷柔以慮事剛以摧強以歌  
以舞正氣發揚氣矜隣石積感非王如韓令劍深謀用  
章如司農簡不懼死亡如應山碑文刻東方君子所執  
如圭如璋越二百年幽然而光吾黨後生忠毅同鄉讀  
此刻辭景德無忘 張孝達集易州田琬德政碑字

故定州直隸州知州馬佳君祠碑

夫九江傳記報功爲典祀之經抱朴內篇德頌有揭石  
之義所以陝東草木懷芟舍之人沔上旄倪酌路衢之

酒託精誠於荒怪羅池稱神縣遐想於山河樂公立社  
凡以揆張豹產雕畫宓期鏘懿圖芳其義古矣定州北  
負陁塞東蟠惡沱五輔望繁之區四支珠玉之地秉麾  
作牧良躅宏多李克樹恩於文侯之朝高淑流惠於河  
清之代永徽之元軌女眞之石泉韓忠獻四裔知名蘇  
子瞻中朝第一籀蹤方軌其惟馬佳君乎君諱寶琳字  
夢蓮姓馬佳氏鑲黃旗滿洲人也君考禮部尙書諱昇  
寅謚曰勤直八州作督三命爲卿羽儀炳乎皇猷行義  
光於柱史君生而憎定長而奇龐孝感致雉翟之祥因  
心流頌鵠之譽風儀洲令八窗四達之名才性都長六

筆三詩之藝由廕生戶部主事出爲直隸趙州知州移  
知定州良弱泳澤芬若椒蘭桀黠聞聲畏逾慈艾佳吏  
無其子諒粗官無其練深在職八年實兼四善可謂籠  
二機而竝運掩三異而孤升者已遷知正定府調保定  
署清河兵備道事仁風翔於巷衢惠問達於旒宸方將  
騁長轡擁高牙而嚙指思親投簪招隱自撰閒居之賦  
無聞北山之移今者遺愛已徂清徽未沫此邦美政略  
可臚焉州南沔澤盧奴故道旱乾水溢下汗高萊君決  
其潘渚寫以落渠重隄之疾旣祛神腴之利斯溥涇泥  
數斗下田皆良鄴畝一鍾首先種入故能埭稱召伯溝

號張網是曰殖利其政一也州有大猾莫敢誰何玩密  
網之凝脂騰燒城之赤口便文賣直鼠善穿墉鴛法告  
姦狐能射影君不陳鼎而燭罔兩不受箛而知馬羊收  
穉季於霸陵案絮舜於京兆虎冠雖健不能燒田叔之  
獄詞鼠磔徒工不敢書絳侯之牘背掾絕文害之習邑  
無訟胥之通是曰擿姦其政二也州治置郵交午冠蓋  
夷庚高雞泊裏之健兒芒碭山中之亡命取人大澤分  
絹林陰君厲秋隼之梭威察淵魚於眉睫五色巨棒四  
部督郵絳縷禽魁青犢匿影十里雙堠五里隻堠如行  
堂奧之間文吏赤丸武吏白丸脯諸高城之上毆京兆

界中之盜賊盡入扶風解天水道之上衣裝付之太守  
桃李懸而不掇桴鼓設而不鳴是曰悅旅其政三也建  
國親民教學爲先移風易俗莫善於樂君傲犬酒之弗  
具閔鱗虞之闕如修治頻宮張設雅樂義堂閔窳青龍  
勒禮器之年石室紆縈白鹿廣子衿之問損一益一之  
管判懸特懸之鍾扣角扣宮不硯不弁在昔史晨銘春  
饗之奏潘乾樹校官之碑揆其設施何慙曩哲是曰文  
化其政四也州境有清風明月二鎮囊家列塵衽服闋  
市叢神好博饗姐能歌一梟五簋之場跼躡彈絃之會  
習沿弟靡鼓扇輕浮君糾之以四維瀚之以五戒本富

末富不催博進之錢大匡小匡坐廢女閭之令投軍門  
之戲具奪北地之燕支九涂之楚桐皆高一夕而齊衣  
變紫是曰訓俗其政五也方志圖經知今鏡古襄陽耆  
舊桂海虞衡君輟兩部之喧囂拾百年之廢墜躬讐油  
素手剡汗青鮮虞肇封靖王就國安喜併省解瀆分封  
胡燕故都遼邦營頓苦陘廛稅曲逆繁耗殺虎兵衝飛  
狐扼塞初唐石墨北宋陶官莫不精據密攬統蒐臚晰  
令儀孝女親裁黃絹之辭悴節桓嫠爲翦皮金之字補  
前人之荒略揚獨行之潛光洵可爲司牧之準繩新尹  
之龜鑑者歟是曰後法其政六也柳子厚漱滌山川員

半千粉澤文雅眾春園址閱古堂基茂草不除風流頓  
盡君睎高慕古長想遠思焚刈蕪蕪繕治闌楯務使愛  
人思樹無聞乎古今觀器升堂寫心於嚮往放衙小吏  
搨永和百本之檀公讌射堂酌中山千日之酒政平刑  
措守樂賓從是曰景賢其政七也賅此七長爰興百廢  
墨膠傅幘是謂真清葦杖懸庭不關細愛牙軍課柳見  
士行之吏才壺士翳桑誦宣孟之實惠梁公饗直獨留  
泰伯之祠季友詞華重建張良之廟語其微烈罄牘難  
殫是用亥生卯壯之苗竝莖雙穗汗血龍文之產一乳  
同槽其去也有解鞶斷鐙之思其歿也有抉璵釋軒之



慕迺者軍州將吏三老學僮訴於行臺上之儀部謂宜  
闡其芳秘報以蕭脂以同治五年十二月朔上聞卽日  
奏可不鄙謫劣來徵文辭予惟汝南之祠荀勗建於生  
存秣陵之祀蔣侯託諸神道神道則涉於誕生存則嫌  
於諛唯茲不朽之名庶符無媿之語乃最其上善俾鏤  
貞珉霜露星河歲時屢臘知朱邑之魂魄猶戀桐鄉喜  
陸雲之圖形常依縣社嗚呼星移谷爛不磨峴首之碑  
麗遠燠今請視雪浪之石銘曰

憲憲聖慈貽我神君琦行瑋度兼資武文文則鸞皇武  
則毛摯義矩不齟仁瀾不息定武之石不可泐思定武

之政不可滅思

祭伏羲文王周公孔子祈雨文

維神道闡苞符德參造化師保父母乾坤其易之門陰陽剛柔吉凶與民同患迺者舞雩閔旱輟耒增憂以太原實爲首善之區而小暑猶有膏屯之象以及雁平道所領之州郡殺虎口以外之邊城素苦貧磽未聞霑足竊念晉省承饑饉薦臻之後乃創痍未起之時杼軸早竭其蓋藏水衡將窮於輔助某等職膺牧養目林子遺政事不修和甘莫迓已羣望之竝走盈缶未占念先天而弗違奉盛以告躬率長吏同省咎愆斲資生資始之

元功紓不耕不菑之急難於戲吏慶於庭商歌於市惟  
期間澤之旁流雷出于地雲上于天仰賴神明之幽贊  
尙饗

祭伏羲文王周公孔子謝雨文

維神一元體道十翼前民與鴻鈞大造爲彌綸以龍德  
正中爲美利辨山澤風雷之位妙萬物而稱神通水火  
燥溼之情生兩儀而成易比以長羸久屈甘澍猶虛已  
窮索祭於羣神惟有歸誠於大聖犧牲敢愛率百吏以  
洗心蟋蟀思憂爲羣氓而請命適徼天幸終閔民艱升  
滋液於懸甕之山回枯槁於飛狐之塞由霽霖而成優

渥時已浹辰自畿赤以暨邊關澤皆下尺從此百生速  
化見綢緼天地之既交逆知三晉均霑俾表裏山河而  
無害凡此耒耨之利絜維行施之功信皇矣求瘼之非  
誣豈寂然感通之所致伏冀默參荃宰宏佑芸生成始  
而卽成終以暄而兼以潤雨若暘若八庶徵叶吉於洛  
書穫之積之萬斯箱告豐於周雅於戲自上下下益欽  
易象之光終日乾乾敢弛民依之念祇陳寅感昭薦秘  
芬尚饗

祭關忠節公

天培

張忠武公

國樑

文

惟二公關張華胄襄鄂英姿勇略奮於風雲忠誠耿乎

日月溯自島夷萌孽赭寇猖獗一則當番舶內犯之初  
首遏長鯨於炎海一則際中原糜爛之會獨摧封豕於  
金陵王濬乃水中之龍敖曹實地上之虎篇成籌海志  
清歐亞諸洲軍比撼山力保蘇杭半壁天顏有喜親承  
召對於五番宸翰親揮詔進圖形於兩本徒以魏絳狂  
和戎之議衛青撓飛將之權嚙指痛而空壁無援量沙  
饑而長城遂壞此則英雄未捷爲今古所同悲功烈不  
刊推中興之首出者矣茲者雙忠並祀五嶺同高聳馨  
香百代之人心厲水陸三軍之士氣虎門截海難平伍  
廟之雲濤羚峽撐天爭附征南之舊部於戲天上雙騰

之劍氣豹死而皮常留波心一顆之珠光海枯而石不爛尙饗

祭漢虞仲翔唐韓文公宋蘇文忠公文

維三君立德功言兼三不朽歷漢唐宋爲百世師經學參荀鄭之間文品列歐曾以上竭忠肝而悟主守直道以危身泊乎放廢之餘力倡儒先之教成所抗遼東之疏弔待青蠅南來書瀧吏之詩居營白鶴行芳志潔比澤畔之靈均雲集景從成海濱之鄒魯化民興學異代同符似鼎足之竝尊宜溪毛之共薦爾乃蒼梧萬里遷客飄零詞林一株舊居搖落訪潮州廟碑之記披髮而

下大荒拜僭耳笠屐之圖負瓢而行田野合祠未備守  
土滋慚茲者就粵秀之山徙安期之宅重恢傑構特舉  
明禋率僚屬以告虔命諸生而習禮過江山之故宅奉  
以師資奏蕉荔之歌詞尊爲神道庶幾激揚忠讜肅啟  
人文窮理則知天以知人修詞則如潮而如海宗仰媿  
東京之盛踵劉陳竇以垂名元精耿南極之躔與斗牛  
箕而竝燦尙饗

祭晉陶桓公唐宋文貞公明韓襄毅公王文成公

國朝李恭毅公阮文達公林文忠公文

粵稽炎漢交州置刺史之初爰及熙朝百粵重海疆之

寄名賢著績更僕難終若乃秉聰明正直之資稱文武  
威風之帥才爲世出代不數人惟七公應北斗之星辰  
作南天之柱石運甓勵澄清之志教陶除回祿之災斷  
大藤而靖諸獠平三泐而收八寨國朝名宦不乏去思  
南昌尙書尤稱弭盜開名山之講舍築列嶼之敵臺經  
解大盛於皇清與圖遠蒐於海國雖仁經義緯一時之  
治術不同而外攘內安千載之心源悉合有功德於民  
則祀微斯人吾誰與歸茲者薦交廣兩部之馨香萃今  
古四朝之賢哲如過錦官城外拜丞相之祠堂豈徒峴  
首山巔讀羊公之碑碣恢張令緒勉勛同官以瞻以儀



有所有報從此嘉祥備致寰瀛躋鏡砥之安祀事孔明  
嶽瀆視公侯之秩尙饗

祭岳忠武王文

維王才兼文武心矢精忠定寇亂於湖湘耀威棱於河  
洛黃龍酒飲誰撓節制之師金字牌宣未遂澄清之志  
立文臣武臣之模楷括以兩言思國恥物恥之振興奮  
乎百世茲當春秋仲敬謁新祠薦雕俎之馨香瞻靈旗之  
恍惚以王長子左武大夫忠州防禦使諱雲王將閩州  
觀察使贈甯遠軍承宣使張公諱憲配嗚呼麻刀背鬼  
常欽破竹之神兵漢水方城永護分茅之舊壤尙饗

祭吳文節公文

惟公學精衡鑑政勵廉隅撫浙江則漕弊剔而水災蘇  
督滇黔則驃部綏而苗氛息洎乎荆山總制滄海橫流  
孤城紆蟻附之危同列逞域工之射衝鋒冒雪混鵝鴨  
之軍聲致命沈淵慘蟲沙之士氣相茲魁阜宜冠靈祠  
攬白雲黃鶴之遺墟憶鐵雨金風之英烈嗚呼曾正文爲  
門生胡文忠爲故吏拔人傑以佐中興陶諡文節名恩培公歿後鄂撫  
殉城守唐諡威恪名樹義同時鄂臬殉水師結同心而完大節永瞻  
正氣祇薦維馨尙饗

祭羅忠節公文

惟公學宗濂洛功著湖湘率義旅以同仇挫凶鋒而莫  
抗邁南宋張彥聞之壯烈教授提兵媿前明王新建之  
遺風軍中講學英雄灑淚甘遂志而結纓部曲傳心終  
集勲而奏凱愴懷戰地肇建崇祠溯偉績以難忘潔明  
粢而祇薦嗚呼按渭原之營壘猶歎奇才數魯國之門  
徒咸懷忠義仰邀靈爽庶冀來歆尙饗

祭畿輔先哲文

惟年月日順天直隸同鄉人士某某等謹致祭於畿輔  
歷代聖賢忠義孝友名臣循吏儒林文苑獨行隱逸諸  
先哲之靈曰入國知教聖人觀王道於鄉以德爲馨古

者祭先生於社我畿輔軒臺肇建周鼎攸居太史公稱  
爲勃碣名都盧尙書謂之聖賢淵藪理大物博被六合  
而成帝畿俗美才多首二南以爲風始仰維先哲德稱  
師表道貫天人或危身以捍國艱或敦行以修人紀或  
樹經綸之業或流愷悌之聲以及學海閎通藝林爾雅  
孤行狂狷蜚遯嘉貞塗雖異而同歸名雖遐而不朽如  
藝文志九流之別各有淵源如魯論語四科之分皆關  
名教今者 祀典聿新爰勅禮容用資矜式從吾  
先進無老成而有典型保我後生光邦家以榮閭里至  
若國殤精爽靈德芳堅竝闡幽潛各陳芬秘嗚呼至于

碣石入于海永欽眾水之朝宗觀其禮器想其人莫罄  
高山之嚮往敬恭無替昭格來歆尙饗

張文襄公全集卷一百二十三終 黃陂蕭延年校